

四庫全書

集部

欽定四庫全書

敬業堂詩集卷四十六

翰林院編修查慎行撰

夏課集

起丙申五月  
盡十二月

長夏家居與德尹約為書課弟方纂輯北史余點  
勘毛詩注疏中有疑義互相剖析此情不異曩時  
所憎者白髮耳

喜東亭弟滇歸見過

時德尹亦  
歸故居

艱辛憐遠別歡喜報初歸萬事付彈指一門多拂衣侵  
晨移爾艇觸熱扣吾扉相對成三老人間此會稀

自五月不雨至於六月二首

一月愁霖歎三旬亢旱憂雲從火山出溪挾沸湯流魚  
鼈潛無所蝸蟾聒不休氣衰尤怕熱計日望新秋

有客京華至為言赤氣同不成驅鬼魅兼恐致蝻螽莫  
瘞神何定精誠感或通仍聞漢廷議策免到三公

得雨

海色昏昏合雷聲隱隱鹿羣情希汜濩天意卹焦枯一  
溉功雖細千林氣稍蘓箒車吾且祝不敢笑田夫

橘蠹化蛭

馬縞中華古今注謂蛭蛭一名野蛾也  
生江南甘橘園中不知乃橘蠹所化

橘蠹凡兩種食心與食葉食葉者速化勢如靈鬼攝

出語

闕尹朝為蠕蠕蟲暮作栩栩蝶公然委其蛭雙翅巧開

合却向故枝頭飛飛繞三匝漆園方大夢與汝形相接  
試問前後身依稀在目睫

立秋夜雨晨起納涼

飛雨灑然過小窻殘月明微風動秋意草木為先聲故

人何方來

樊川詩清風來故人

一笑披衣迎端能起我懶天地非

無情取用及須臾寸懷良已盈茲晨不兩旦莫負鷄三  
鳴

秋暑三絕句

秋暑不減三伏天杖藜隨我來谿邊跳蛙自得坎井樂

上有夕陽高柳蟬

學書遠遜王右軍學奕無過王積薪日長如年大好睡  
小技何足勞吾神

布幔十幅當檐牙東南好風渾被遮床頭非無蚊遶鬢  
案上幸少蠅集爪

題毘陵徐思肖詩卷後四首

郵筒寄我一編詩天然神骨清而奇騷壇家將生有種  
看取陣前姑蔑旗

宮體徐摛一變新傳家又得石麒麟年來咄咄欲跨竈

莫怪阿翁誇向人

戲用東坡尺牘中語

錢四才華世所稱乃郎筆力亦騫騰

謂同年錢綱庵父子

同鄉遂

有兩勁敵詩派今屬南蘭陵

狎主齊盟事不難並驅應許八蹄攢老夫合退三舍避

憑軾試從壁上觀

七夕前二日同德尹濬安飲東亭齋二首

水淺菖蒲港船通皂莢橋為歡湏永日相過復今朝  
草徑荒初闢桐陰薄漸凋歸休真上策何待蚤招要

同祖如同父為兄忝伯兄家貧餘世業官滿得鄉評  
糝醬調藜糝厨薑芼醃羹向來疏酒盞一飽累經營

秋庭

秋來無一事物態頗相撩是葉湏防蝕無根不耐澆  
歌花危露蒂修蔓妥風條滿目皆生意吾庭未寂寥

賦得雨中荷葉終不濕六韻

爾本池中物翻從濕得乾出泥莖濯濯帶雨葉團團  
散作干聲去歌留一滴難高低承翠蓋大小走珠槃灑脫

渾無跡陰晴詎改觀肯同凡草木漏澤妄思干

雨後行田

水氣一村蛙晨光幾點鴉畦風涼病骨衣露涉秋花正  
爾闕農事兼之遠俗譁桔槔閒挂壁勞苦及東家

寄吳少融二十六韻

時吳宰  
壽光

忽忽三年別遙遙異地情索居雖潦倒結念每迴縈憶  
昨同晨夕惟君獨老成吉人辭樸訥端士意肫誠躑步  
寧愁失沖懷敢自盈授經依北郭請業到西清榻愧陳

蕃設詩容顧况評出攜青樓管歸傍短燈檠績學承名

父高才敵令兄

少融為梅村先生幼子西齋給諫愛弟

向來留著作兩度

費咨呈自我辭書局憑誰問客旌九衢千轍軌萬事一

甚砉枰他日乘軒鶴當時出谷鶯先鞭輪祖逖上第失楊

英夜雨新豐市秋風古灌城得官隨本分為政且神明

側聽衣冠誦如傳襦袴聲科條煩是累民社寄非輕示

俗因奢儉調絃戒改更免教同列忌休矯一時名此外

佳眠食其他簡送迎陳編間肯廢古道力能撐便欲觀

風去殊難抱病行  
撫躬憂浩蕩回首歲崢嶸  
為報鳴琴宰應憐  
撒瑟生西河餘痛在  
雙眼不曾盲

八月初四日放舟至破石

習嬾常支戶乘涼偶放船  
渠清瓜蔓木露白稻花天  
夜氣鳴雞後晴光蕩槳前  
地平先見塢高出萬家烟

西阡桂六韻

手種西阡桂三年漸看長  
玉蘭輸舊翠金粟試新黃  
露重朝流潤牆低遠遞香  
娑娑佳月色報畝好秋光  
敢擬

我為柱差堪署作堂丁寧松檜伴稍待共成行

南堂桂八韻

五桂階庭樹迎秋候蚤催著花多四出得氣必齊開自  
我先人植仍資造化培好風香世界涼影月樓臺天上

逃斤斧山中混草萊在家僧偶聚不速客頻來

時衍齋  
東亭不

會期而豆莢瓜瓢味兄酬弟勸杯最宜星露下永夕與徘徊

徊

偕季方東亭德尹曾三諸兄過東林庵

北郭吟筇罷東林講席收

憶四十年前陪范文白先生來遊事

能無三宿

戀復作五人遊攬掃庭常潔牋題壁尚留影前香一瓣

來往記風流

時坐旋法師影堂

題周少谷杏林雙鹿圖為老友徐韓奕壽

杏為仙人林鹿是仙人友少谷寫此圖卷舒落吾手愛  
其粉墨久若新畫又挂壁濃香熏朝來詩成畫亦往持  
以贈君兼壽君與君論交從壯盛通介看成徐邈聖我  
如麋鹿爾為羣豐草長林同此性

臨平舟中

作雙白鷺起前汀西望山光的青暗數永和隄畔路

宋趙誼父過臨平詩  
居人猶號永和隄

一橋十里似長亭

虎林與同年許莘莖話舊時初自蜀歸四首

烹鮮滋味定何如叱馭行經萬里餘今日秋風吹櫂轉  
江鄉原不少鱸魚

冷曹需次問何司剩許閒編楚道詩五角六張成底事  
人間吉日是歸期

旗鼓相當膽氣麤生平事事不曾輸輸他對我誇年少  
漆點烏絲一尺須

同年難得况同鄉久別重逢感歎長百五十人餘幾在

勸君狂得且須狂

時連開劉大山陳巨高李時夏三同年凶問狂得且須狂借用香山成句

題安平泉上二首

自從兩乳垂天目中有神龍不測淵直到臨平山脉斷  
尚溥一眼在山泉

我讀咸淳潛守志曾收元祐罪人詩摩挲一片竹間石

好事僧稀問向誰

南宋潛說友咸淳臨安志云仁和縣安隱院地產曲竹竹間有池名安平

泉東坡題詩云云按東坡題安平泉七律一首集中失載余曾采入補遺卷中今至泉旁尋碑碣不得故云

曾濟蒼遠致秋蘭一本重陽前試花寄詩報之

廣文能好事貽我婺州蘭不共三春賞翻從九日看同  
心如爾少獨立後時難待作幽人佩清香可耐寒

世棄

世棄身何與身間分已過讀書新得少見夢故人多黍  
熟來初釀池荒足敗荷東籬佳節近不醉擬如何

吳起君重陽送菊至

今歲寒氣蚤應節微有霜

是日霜降節

開門得君書遠致籬

下黃瓦盆三十本羅列成重行  
端如衆君子正色登我堂  
吾衰萬事慵酌酒不盡觴  
何以畚佳貺託詩紀重陽

後三日邀諸兄弟賞菊席上放歌

吾鄙吳生字起君知余雅好忘  
余貧扁舟送菊乃無酒  
正及九九清霜辰招呼近從  
南北巷假借半出東西鄰  
後庚三日稍稍集義取兄弟  
不及賓有如田家大作社

杖白頭者凡七人合年四百七十二雁雁排翅魚排鱗  
天公貺我美風日歲云暮矣行食新海蝦挾須白出縮  
榘蟹負殼紅輪困木瓢木杓傳父祖中貯蕪味清而醇  
興來大壯客顏色詩好全得花精神人間所歷皆夢境  
至樂孰與田園真勿辭醉插滿頭去一笑正落陶家中

少睡

秋去寒猶薄冬來夜總長階前黃葉滿門外朔風狂舊  
得休心法新傳養目方癡兒憐少睡檢歷勸移床

秃筆吟二首

久被宣城束縛加鐵梳膠綴老年華耗磨毛遂囊中穎  
零落江淹夢裏花縱不封侯追定遠誰能銘冢向長沙  
畫工掃壁休嫌秃會見麒麟出咄嗟

書不中書觚不觚也曾東抹與西塗姜牙斂手輸雞距  
虎僕藏鋒讓鼠須墨沼涸逃蓬館債硯田荒貸管城租  
免冠一博秦皇笑差勝中山穴處徒

問東亭病

天末清貧吏身還病亦隨用巫真下策勿藥得中醫

語出

漢書藝文志

瘴霧侵肌重冰霜造物慈入冬思合醪為爾尚

遲遲

毛詩箋入必共族中而居又有祭脯合醪之歡

隙先

隙先野馬去如馳正是先生靜坐時病不求醫吾有命

老方學易世無師回思少作雕蟲比轉悔餘波綺麗為

喚起景陽來入夢擲將殘錦乞丘遲

去聲

芝田長子字西山賢而有文游學京師一病不

起旅櫬還家詩以當哭兼慰芝田

天心洵茫昧家運關彼此可憐兩長男相繼俱客死

七兒

歸柩去冬亦於十一月到家

倚問冰霰後歸櫬風霜裏割愛難以慈

奪情莫若理明明聖賢教五十不致毀父母恩且然矧  
乃施於子吾本同痛者勸君兼自慰知其無奈何安命  
而已矣

冬課吟效擊壤二首

炳燭餘光已可知假饒聞道敢云遲故人問我三冬課

六十年前上學時

順治丙申余  
七歲方就傅

畫前有易易如何刪後無詩詩倍多更向誰邊討消息  
水從冰後不生波

棄裘

禦冬年已久毛禿僅皮存等是犬羊鞞永辭狐貉溫留  
之竟安用棄爾似無思改作吾何望茅檐去負暄

長至

天地有肅殺微霜為驅除洎乎冰雪交慘者旋以舒來

復子之半始凝履之初何須當既剝然後觀盈虛

望歲集

起丁酉正月盡九月

三年來元日連遇風雪歲事不登生理日窘朝來  
天色晴霽農占其有秋乎老圃望歲殆同老農也

元旦喜晴

一從朝請廢冰雪博高眠却展山中歷重瞻霽後天兒  
孫粗識字兄弟繼歸田此外非吾分隨人望有年

邑侯陳衡山壽十二韻

海角桑麻邑沙灣島鹵田極知吾土瘠端賴令君賢侯  
到纔期月民勞已有年上官頻按部下戶忍施鞭利器  
無盤錯長才展事權緩征舒積困雇役免齊編酌劑心  
良苦橋度弊悉捐政成單父速名媿太丘傳麗澤三春  
渥仁風百里宣初辰花照座佳氣柳含烟里老霞觴後  
村童篠馬前也應容野史來奏雅琴篇

正月十八日借德尹西阡看梅兼邀曾三芝田  
東洲諸弟同飲花下三首

西麓寒梅樹年年二月開今年開獨早應為兩人來  
已是四回看憐渠閱歲寒同時手栽者松栢長偏難  
隨意致芳鄰壺餐勝觥飯尊前一校點且喜人皆健

及門樓敬思自粵西遠寄潯桂

隔年一信到何遲寄我潯州茵桂皮已向籠中儲上藥  
只愁天下少良醫情深遠荷門生致性在終於野老宜  
別與蘓家傳釀法搗香篩辣味尤奇

贈杖

倚賴支離叟扶持拙病翁長虞故步失不為暮途窮世  
乏三年艾家無五尺童用行吾與爾形影畧相同

補屋海棠萎而復甦借德尹芝田作用黃山谷  
體

前年爛若雲錦堆去年憔悴無花開今年芳意莽復回  
人情貪多似嫌少却是花稀看愈好閱汝盛衰成我老  
白頭似白紅顏紅花如有語解勸翁夜闌莫放清尊空

再次芝田韻一首

隔霧看花三老翁未甘白髮負春工一梢欲墮胭脂雪  
幾朵猶含蓓蕾風爛漫人情沉醉後寂寥詩味卷帷中  
相逢莫漫嗟遲暮悟徹從知色是空

原詩有相逢可惜  
已遲暮之句故結

云句

聞副相揆公正月初六訃音小詩寄哀四首

宮內稱才子臺端倚重臣得

君時最早歷試品尤真嗜苦餘千卷門闈少雜賓不知經  
幾劫還復有斯人

卿月三臺墮文星八座懸望高虛相業才大損天年謝

客終成佛

生平留  
心內典

王喬竟得仙所傷江鮑體無子孰流

傳

憶昨歸田後情親分不移為憐吾已老長恐見無期急  
遞書頻達因風報輒隨半年遲作答魂夢至今疑

何當承遠訃豈是誤傳聞四海誰知已餘生又哭君有  
文披舊橐無酒酌新墳不朽將安託從今硯擬焚

牆角郁李花盛放

碎霞剪綺綴繁枝

陸魯望郁李花賦  
碎細綺剪明霞

偏反阿儼自一時

春到軒庭無悴物又收常棣入吾詩

連朝風雨園庭海棠零落都盡而瓶中折枝娟

然獨秀老夫欲不誇為佛力其可得乎

兩株芳樹全搖落泥汗胭脂亦可憐值得拈華成一笑  
風灾不到四禪天

芥舟二首次祝尚于原韻

蜃樓鮫屋總非真愛爾虛舟遠俗塵芥納須彌中有地

杯浮滄海四無鄰  
琉璃貯篋團團鏡  
綫毯鋪筵寸寸茵  
容得兩三人坐否  
故應魚鳥自相親

水滿坳堂柳拂梢  
不須結宇用香茅  
觸蠻有國爭蝸角  
燕雀何心占鷺巢  
茶竈筆床人共遠  
蔣牙荻葉影相交  
未能便作浮家去  
倘許門從月下敲

三月三日雨中潘竹村祝尚于周楚和三老人  
偕赴德尹之招翁源姪不至席上口占寄嘲

又是重三被袂期招尋也復逐羣嬉地偏俗儉人多壽

歲美風和雨應時木芍藥花開正好野醪醱酒醉何辭  
竹林一阮真疎放不豫吾流太好竒

重宿寒中書齋

桐又將花柳又綿山齋一榻故依然曾借老友成三宿  
却話前遊過十年白髮昏昏中酒味青燈黯黯讀書緣  
只憂海近沙頽岸夜半潮聲撼客眠

丙戌秋與竹垞連榻齋中能無存歿

之感

制府滿鳧山同年奉

詔巡海道經吾里詩以迎之四首

十年翠蓋不南巡  
千里巖疆寄重臣  
看取隨身三五騎  
肯教供億累州民

水滢山陬被澤深  
兩邦旌節喜重臨  
每逢田叟停車語  
徧示

君王愛養心

番鍤千家傍海墺  
崩沙日費水衡錢  
福星昨夜臨吳分  
斥鹵重開負郭田

雲帆星島駛經過海外風恬可有波一事尚煩公入告  
兩闕歲課本無多

春盡日雨中招諸兄弟為櫻筍會

老去邀歡要及時肯緣泥濘阻前期舊年風雨正如此  
今日陰晴昨豈知入饌朱櫻貪摘蚤翻階紅藥笑開遲  
兄酬弟勸更番事但到尊前醉勿疑

德尹於得樹樓後築屋三楹既成以詩落之

五架三間屋千竿萬個園竹深堪障日樹老莫傷根此

牖斜穿沼南榮短界垣景難兼與曠意在適涼溫粗遣

規模具翻嫌布置繁移書驅壁蝨品石斥湖黿雞柵寬

螻螳牛宮祝子孫誰為張老頌聊托仲長言

謝康樂山居賦仲長

願言流水高山

幸爾留閒地容余補壞樊一菴何日就笑指畫

圖存

偶過駕湖

村北村南綠滿陂溪山百里放船宜鳩鳴甚熟蠶三起  
燕掠風梢麥兩岐乍暖故知非雨候薄遊何必定花時

兩湖地主今誰在每到徒增感舊詩

與靈上人餉龍井雨前茶二首

風篁十里郎當嶺官焙爭收粟粒芽慙愧老僧親手摘  
青紗蠟紙餉山家

今年穀雨雨庶纖茶味全勝笋蕨甜正自不嫌山少肉  
肉山無此好毛尖

老友鄭寒村歿後五年其子義門攜愛蓮畫像  
過余屬題得二絕句

自脫朝衫換幅巾，祇應營道想前身。  
儵然出處行藏外，

誰識完人是半人。

寒村晚年病風能以左手作書畫自號半人

更有何人識雅懷，一琴橫膝對花開。  
多慙後死黃山谷，曾見光風霽月來。

### 梅雨

半月濛濛雨，千畦釋釋耕。  
麥租雖未入，米價漸將平。  
屋老礎長潤，庭虛苔任生。  
吾脾方畏濕，却立候新晴。

德尹第四子滿月詩當祝辭

多男孰云累晚景人尤羨薛鳳乃踰三荀龍剛得半家  
門增喜氣當暑清風扇膩髮搓成團貫之五色線耿耿  
垂大耳皎皎開方面出左傳注騰上所未知豐下已可見我  
來拊汝頂為汝祝初旦一祝兒長成再祝爺強健三祝  
好弟兄他年相友善

秋灾行

西流之火方蟲蟲兼旬不雨亦不風先庚後庚凡五伏  
秋暑酷於六月中河流旱乾田拆罅誰遣天吳來潤下

淡塘灌注味作鹹仍恐良苗變枯稼天平降割此一方  
相怨勿謂民無良神疔鬼瘡何處避且死那復論流亡  
老夫本病在腰腹不受淫邪外來觸只餘雙耳未全聾  
忍聽村鄰百家哭

盆中草花二種已含蕊矣朝來忽萎

霜後冬收子春來雨發芽關心經夏旱滿眼望秋花忍  
負栽培力徒勞灌溉加童烏苗不秀能免子雲嗟

中秋夜與德尹對酌

今夕是何夕弟兄俱在家狂吞杯底月笑指霧中花老  
子興不淺達人生有涯底須愁後夜圓影蝕蝦蟇

十六夜復與德尹小飲弟有詩次其韻

既望猶未望今年異往年連宵雖博醉老景劇相憐但  
有兒搔膝何須客滿筵好詩能賽月脫口自清圓

秋花

雨後秋花到眼明  
閒中拄杖繞階行  
畫工那識天然趣  
傳粉調朱事寫生

五雜組九首

五雜組玄黃帛往復還牛馬跡不得已主避客  
五雜組新嫁孃往復還遊冶郎不得已時世粧  
五雜組雙鷓鴣往復還兩蛺蝶不得已君棄妾  
五雜組刺繡手往復還貝錦口不得已掩耳走  
五雜組蠻貊訛往復還井轆轤不得已歸來乎  
五雜組羅浮雀往復還華表鶴不得已生處樂  
五雜組青紫檀往復還新舊券不得已錢神論

五雜組蝶戀花往復還蜂趨衙不得已東西家  
五雜組采染綃往復還燕覓巢不得已思故交

古詩四章

天荒地亦老變化蕃草木自從開闢來悅人以紅綠有  
榮斯有瘁坐覺流轉速傳語好風光寧能銜無目

衆虬國大槐擾擾成侯王莊周化蝴蝶與物亦未忘至  
人豈無夢夢則超形相蟲蝻所不爭是曰華胥鄉

域內有名山攀躋力可至人皆造其麓抑或半嶺廢歸

來述所見彼此不相似等是未登峰毋為笑平地  
徒歌易成謠獨唱難為喞我琴誰我瑟我鼓誰我鐘知  
音苟弗存奚取覲面逢遙遙千載下或有牙與鐘



敬業堂詩集卷四十六

欽定四庫全書

集部

敬業堂詩集卷四十七

詳校官左中允臣瑋五珠

助教臣常循覆勘

總校官庶吉士臣倉聖脉

校對官中書臣雷純

謄錄監生臣陳止琚

欽定四庫全書

敬業堂詩集卷四十七

翰林院編修查慎行撰

粵游集上

起丁酉十月  
盡十二月

丁酉夏同年有自都下來者傳佟陶菴中丞意遲  
余作粵東之遊背秋涉冬畏寒擬不出矣余弟查  
浦曾三至其地間語余曰嶺南無霜雪且兄生平  
游蹤所未到盍一往焉遂於十月初俶裝明年四

月由粵西旋里往反幾二百日檢點道中詩約如其數分上下兩卷錄存之

將有嶺南之行雨中過龔蘅圃侍御田中話別  
小別條三載相望渺參辰舊交半在亡邂逅得兩人喜  
汝罷官後田居傍城闌我來叩門入迨此風雨晨問我  
將奚之有懷難具陳白頭萬里役正坐不耐貧頽年知  
幾何復爾聚散頻篋中有佳句在遠情彌親

時侍御以田居詩藁

屬余  
作序

早發富陽喜晴

午辭樟亭驛夕抵富陽宿霜日曉初晴烟江寒更綠鷄  
鳴茅宇近鴈下潮田熟萬株楓柏林散作錦繡谷平生  
山水興臨老猶未足聊復紀初程清吟待茲續

桐廬

山偏不可城千家聚成邑民居半商賈仰取俯有拾斬  
櫟起炭烟割林收漆汁托身覆載內生理隨分給壯年  
不早計暮齒行已及莫怪杜陵翁茫茫百憂集

念兒作釣臺詩未識嚴先生不受官之故徒以  
高隱目之作一首以廣其意

武宣馭下如東涇課職東京亦孔棘

語見後漢書二  
十八將傳論

官直欲臣故人此意先生應早識逃名事偶同高尚避  
辱心孤轉深匿羊裘一領却累渠苦被旁求相物色伏  
波謗生蕙苾珠侯霸得罪由司徒客星非將亦非相吏  
議可得加狂奴君不見璜溪老吏不自重出應于畋後  
車夢萬古江湖兩釣竿潛龍勿用鷹揚用

三衢道中口號四首

水落灘尤窄輕舟一葦容  
機心與機事那免怨機春  
沙際集飢鷺修翎冷自梳  
孟嘗門下客大半食無魚  
兩岸丹黃色千家橘柚林  
勿嗤奴價賤顆顆鑄成金

明日川程盡聊為半日停  
多煩賢太守為我致輿丁

謂

培之  
太守

早發常山大霧

苦霧忽吞天去城不數武  
如行襄城野七聖迷處所  
初

旭漸漸高寒光翳復吐  
杳然墜醉夢既覺乃停午前瞻  
懷玉峯峯峯垂白縷西江行在望未濟恐多沮

舟發玉山

高灘稠竹節尺水浮瓜皮前經彈子渦膠淺時有之路  
長景苦短坐送西南馳却憶前年歸正當暴漲時一程  
破三日上水宜遲遲不謂下水船艱難亦如斯人生順  
逆境閱世老更悲

重過貴溪與同年王辰幟明府

我昨停舟爾下車三年重到勝當初冬來天氣晴尤美

畫裏江山錦弗如官況不離文字外

時分校鄉闈頗稱得士

風謠

閒續笑談餘象山亦是先賢蹟好並鵝湖入志書

鉛山施明

府重修鵝湖書院屬余編輯志書貴溪管內舊有象山書院故及之

### 龍津阻雪

地少雲多處風饕雪虐時客程當歲晏天意警年哀輕  
出自成悔遄歸更勿疑平生多類此既往可勝追

### 雪後渡彭蠡

雪山四望開彭蠡豬其中天先落東北寒氣青濛濛獨  
往矯孤鶩羣飛駕高鴻沙明洲淑出葉潰枝顛空此行  
向南州聊慰離別悰三年女憶父千里兒隨翁生涯豈  
無涯作計誠匆匆寄謝官亭神歸帆幸分風遠遊興欲  
盡一笑非途窮

南昌遇袁州太守葛賓廬二首

懷抱因君又一開人間洵有出羣才勿輕僻左宜春郡  
曾屈昌黎作守來

南浦維舟不記巡眼前冠蓋一時新也知諸葛真名士  
來與貧交作主人

南昌旅次答吉水令湯納時表弟見懷之作

四首

與君稱中表同是庚寅生以我半年長白頭忝為兄  
來寂寞遊奈此離索情相望四百里一水空盈盈

隨身乏長物投贈殊戔戔子貧乃過我報以雲藍牋  
成十四章字字珠琲圓稍增行笈重笑擲看囊錢

世降士不情矯廉競稱高萬鍾避蓋祿半李分蟬糟  
達

者殊不然寓形隨所遭時無謝仁祖菜把思亦叨

同里兩湯生一登青雲梯

謂西厓少宰

一滯百僚底長恐簿

領迷烹魚溉釜驚好音良可懷逝將掃吾軌歲晚期汝  
借

雨中早發南昌留別李壻暘谷

把酒對西山開船溯南浦數聲城上櫂幾點沙頭雨依  
回骨月恩戚若去吾土老人情懷惡含語不得吐官罷  
有孤蹤路難無定主忽愁魚化鐵且作鴻遵渚朗咏白

絲行行行忍羈旅

豐城縣北十里磯頭山上有曲江祠朱文公往  
還湖南時與李後湖姚雪山遊此後人因奉粟  
主以祀三賢詳見李崆峒祠記中今以韋武陽  
易後湖者訛也

贛江西南來天矯北走龍到此乃東折磯頭扼其衝是  
名曰曲江形勢險且雄扁舟清夜詠倡自紫陽翁同時  
李與姚杖履偕遊從三賢列祀典蔚為名教宗世俗不

好古變置靡所衷作詩糾謬誤兼以警盲聵

樟樹鎮

舊名清江鎮

瀟灘流下櫂歌聲一曲清江見底清老樹不知生意盡  
尚憑古社占村名

泥溪口枕上聞雁

陽鳥踰彭蠡飄飄尚南飛晨光若前導羣起泥江湄數  
聲枕上過傾耳漸入微彼非我同羣安得相追隨我帆  
十二幅取用常半之何以不用全波濤怕歎危下有無

底竇旁有不測磯身乏雙羽翰爭先後奚為汝往太急  
急吾行故遲遲茲遊到嶺南諒亦難久羈歸時倘見待  
入春以為期

峽江縣

舊日周瑜埭今為小縣城踞高因峽勢隨地改江名潦  
縮漁添戶時清戍減兵大都從此去彷彿蜀中行

雨中望玉筍山

水遠山平四百里兩崖斗拔滄江起舟人遙指三三峯

名山記玉筍  
有三十三峯

亂插芙蓉雨新洗仙家縹緲住仙壇不道  
人間路大難請看玉筍山南路漸近西江十八灘

過桐江口不及訪同年李培園侍御以詩代東

念昨別京華君方入臺端操持紀綱地正色不可干如  
何神武門亦挂惠文冠早知世路隘不及山中寬自聞  
返谷村松竹為改觀築亭名補過於義恐未安古來賢  
達流要視進退間我欲賦碩人為君歌考槃最哉承世  
澤名節初終完

螺山文丞相祠

千古興亡恨忠臣未運多死難扶少帝生不愧魏科慷  
慨憂時策崢嶸正氣歌黃冠故鄉意廟貌在山阿

青原淨居寺七祖道場

錫泉一派接雷泉味是曹溪六祖禪欲識廬陵米貴賤  
憑師問取下江船

白沙渡

兩岸沙痕疑雪一村竹氣如煙風竿獵獵酒旆雨笠遙

遙渡船

泰和城外望快閣

西昌漢古邑地勢實開拓鏡光十里平倒影見城郭浮  
岡南北峙雙秀拱一閣緬彼白下宰流風宛如昨官清  
無俗情景勝擅傑作冰絃絕已久人境兩寂莫除却謝

元暉澄江何處著

澄江一道月分明山谷登快閣詩中  
句也世以此元暉澄江淨如練云

十八灘絕句 并序

按志自贛縣至萬安中有三百灘孟襄陽所謂贛

石三百里是也然陳書云贛水本二十四灘武帝  
發虔州水暴漲高數丈三百里巨石皆沒止存十  
八灘耳世稱十八灘者當本此明嘉靖朝湛甘泉  
自南司馬告歸過此作十八歎今得詩亦如之各  
取灘名中一字為韻非云相襲亦勞者自言其情  
而已

習坎險在前何人不惶恐到此退已難應思急流勇

右惶恐灘

巨石浮牛背亭亭鷺足翹入鷗羣不亂愛汝好風標

右標神灘

連日遇石郵溯洄良苦辛滔滔天下是不問久知津

右綿津灘

舟人連紙錢例拜灘頭廟來朝風順逆今夕誰能料

右大料灘

後灘接前灘川脉互縈繞人間爪牙毒為害長在小

右小料灘

問言洵有神受命若酬酢借取方便風泥行免郭索

右武索灘

侵曉上曉灘我睡不覺曉向來坐有心憂患亦不少

右曉灘

萬里黃河水崑崙乃發源贛江源漸近應號小崑崙

右崑崙灘

虔吉此分疆灘聲一倍長人家盡柴步墟落半漁梁

右梁灘

雪少偏多雨朝昏水氣腥青洲洲畔草臘月已青青

右青洲灘

礪礪相摩盪驚濤盡日喧直同雷奮地不獨雨翻盆

右銅盆灘

大波深為淵小波淺成瀨安得并州刀剪此青羅帶

右落瀨灘

長年生狎水豈有不龜藥幸自少層冰可憐多赤脚

右狗脚灘

莊生工寓言率以小况大必若魏王壺人間能幾箇

右大壺灘

失勢落江湖中流賴一壺千金奚翅直人有不貲軀

右小壺灘

劍戟礪鋒鋠森森兩旁吐狂瀾障不得為欠中流柱

右天柱灘

石欲截江斷江流奮怒前來如弓挽強去若箭釋弦

右橫弦灘

用盡灘師力今朝過鯨灘我無牛酒犒愧爾報平安

右鯨灘

自贛州換船至南安

八鏡圖中路西來五換船鄉心同北望客况異南遷

東坡

南遷時作虔州八鏡圖詩

秀嶺標雙塔清流穩一川好風三百里計

日指蠻天

過南安傷陳六謙太守

太息南安守居官僅二年如何千丈氣竟掩九重泉

業孤孫盡書名一郡傳經過少交舊回首極淒然

與大庾令李阜如同年

同年四開府百里獨棲鸞邑是衝煩邑官仍本分官

李  
舊

宰新別來顏各換此去歲將闌珍重留行意猶餘舊眼  
看

度梅嶺題雲封寺壁

閱盡波濤險阻途頓教磽确失崎嶇梅花遂裏三關戍  
錫杖泉邊六祖孟過客儘貪風日好居僧曾遇雪霜無

他生行脚緣猶在又入騎驢度嶺圖

衣鉢亭

夜半傳來消息真本無明鏡自無塵問渠衣鉢留何用

猶有焚衣毀鉢人

明魏莊渠事

發南雄凌江方涸舟行一日纔十許里排悶成

歌

凌江歸壑當深冬城隅纔可溝洫通麤砂細石單槽中  
直與船背相磨礮船頭纖纖船尾大舵師束手輸篙工

篙工作力如羸熊腰身寸寸彎彊弓蟲行禪縫蟻旋封  
跛羊登山鷓遇風人間癡鈍有若此歲聿云暮愁衰翁  
愁衰翁翁行作歌歌未終羊城尚隔千里外一夜夢逐  
南征蓬

偶閱楊誠齋南海集途中多賦桃花且有梅花  
應恨我來遲之句余度嶺正值梅放時戲效其  
體作一絕

我來時候異誠齋不見桃花只見梅博得口占詩一句

千枝齊向臘前開

晚過始興江口再效誠齋體二首

始興江口水平川從此通流到海邊我是漁船釣竿手

又攜策笠上樓船

昨喚吉安漁船至贛今所坐乃廣州樓船按樓船之名見漢書今仍此名

不必皆官舫也

一重山轉一重灣不出孤帆向背間行過前灣試東望

夕陽多在隔溪山

冬暖

榕葉交陰筍出窠南中冬律似春和  
敝裘藳在猶嫌厚老研冰消可待  
呵蚊到宵來飛不少蠅於秋後集還多  
所嗟無補桑榆暖奈此霜髯雪鬢何

望韶石二首

西瞻蒼梧雲北望洞庭野浮光表  
震闕古雅傳奏雅聖主不南巡  
羣峯赤如赭魚龍久寂寞孰是聞韶者  
好風自南來吹彼松竹林鏗然中  
音會中有太古心典樂者誰歟  
蕭韶此遺音虞廷去我遠俯仰成古今

韶州風度樓

公進千秋錄開元極盛時知幾同列少去國一身遲終  
始全臣節安危動主思高樓瞻畫像風度儼須眉

雨發韶州

蒲帆十幅去不停波光瑟瑟烟冥冥芙蓉驛南一回首  
三十六峯雲外青

虎頭磯歌

在太平關南十五里

亂山少肉谿乏泉渴虎下飲清泠川飢蛟掉尾不得取



人報竒事起掃一篷白客子亦欣然干岑無寸碧梅花  
落已盡春事早狼籍長恐百卉腓陽機畢漏洩却將粟  
烈氣擎斂使凝結乃知朝來寒特為桃李設豈無雷雨  
候候至方甲折留取道旁春明年作佳節

彈子磯阻風

曲江入海流一縷紫驚蛇中逢彈子梗格鬪逞角牙狂  
颺鼓狂瀾噴石作雪花舩郎好身手過此不敢誇筮易  
遇涉川利用需于沙南遊本無事汲汲奚為耶但使躁

心平何憂前路賒止時吾泊宅行處吾浮家

觀音巖

石縫何年裂中央架小龕老僧如燕子乞食語呢喃

英德道中雪霽

輕冰結沮洳飛霰集阜岡樽桑東南枝炯炯呈初陽地  
暖劇流濕天空淡浮光英山碧差差英江綠泱泱不知  
夜來雪疑是朝來霜

英山二首

曾從畫法見巖頭董巨餘蹤此地留漸入西南如瞰蔗

英州山又勝韶州

一拳一角總峯巒可惜天教落百蠻好事吳兒渾未識

買園只鑿石公山

舟中即目

屋角菜花黃映籬橋邊柳色綠搖絲分明寒食江南路

賸欠桃花三兩枝

順風挂帆連下涇陽香爐清遠三峽

巴東三月昔聽愁，嶠南三峽今則不。北風晨發滙浦縣，

英德舊名滙浦

吹我桂檝沙棠舟。峽中之山阻且脩，峽中之水

平不流。涇陽畫屏地，底拔大廟紫烟天。際浮就中清，遠更秀出造化有。有意窮雕鏤，青茵苔花萼。競吐綠玻璃，鏡奩初收華陽道。冠簪碧玉竺國寶，髻垂珠旒仙人笙。鶴雲渺渺帝子環，佩風颼颼漸行漸遠似相送。一重一掩如相留，片帆飛渡二百里。又見孤埕迎船頭，天憐此老太岑寂。旣以竒景須詩酬，人間夷險非境造。自我發興

成清幽君不見東坡先生海南句平生竒絕誇茲遊

清遠峽飛來寺

兩崖勢欲合中被江流穿上有佛者廬飛來自龍眠

梁普

通中事詳  
載寺記中

神人所施設是物無頑堅想當初風雨

驅神鞭鑿開渾沌竅巧貯聰明泉僧房若蜂房一一皆

倒懸爾來幾閱世不計草木年磐石具生機長根外包

纏波濤潤其趾日月行其顛散為松栢香聚作梅檀烟

蔽虧東西景軒豁子午天呼猿

洞名

在半空日暮躋無緣

清寒難久住仍放出峽船

胥口村

玉鏡臺何處江形就海低

地有玉鏡臺相傳安期故蹟

地平山斷續

潮滿岸東西生理漁樵足人家竹樹齊天涯各風俗  
客自淒迷

白塢岡浮石

萬古江心石回江使倒流潮頭爭出沒山骨判沉浮

按志

白塔岡在三水縣東南臨水水中有石浮沉各一

我鴨寒來集黿鼉夜出遊漁

翁牽小網故故傍沙頭

沙口待潮

艇子膠沙背坳堂等置杯何須愁日暮會有夜潮來

初至廣州與大中丞佟陶菴同年話舊

六首

五年一別隔蓬萊芳訊遙傳庾嶺梅天上故人開府出  
田間野老輟畊來山高海濶梯航路武達文通將相才

竊喜小詩言果驗濟時餘力正恢恢

余出都時留別詩云君才畢竟為時

用故落句及之

雙闕浮光氣象新

雙闕浮光照短亭東  
坡題盡善亭句也

天教八座代

南巡誰能地望兼  
門望君本親臣  
又世臣行處風霜成  
化雨坐看冰雪變  
陽春眼前袞袞皆  
時彥可有同心共  
事人

端倪軒豁得奇觀  
浴日亭邊眼界寬  
兩袖有風驅瘴癘  
百蠻無警靜波瀾  
封疆自昔雄茲土  
科目人今重此官  
見說密章時入奏  
葵心何處不輸丹

恩深自覺心逾小  
才大何妨氣獨豪  
節鉞威名行地遠

文章壇坫比官高中郎題字推黃絹太白分光屬彩毫

莫笑將貽無俗物一條冰是舊同曹

時以耿絹湖筆奉贈

詞人例作嶺南遊自嘆蹉跎到白頭浪跡又看成萬里

著書何敢望千秋誰為善相肥嫌瘦世有知音唱或酬

輸爾滕王高閣句一時唵徧十三州

中丞過南昌有詩上滕王高閣望章

江門外有清流之句為西江傳誦

敢將孤鶴齒羣鴻性癖終難與俗同天下迂儒猶賸我

平生知己孰逾公曾陪供奉雲霄上每憶交親氣槩中

今日相逢重戴笠下車還見古人風

寓居仙湖街庭桂盛放

客居澹無事庭下獨徘徊忽有微風度香從何處來  
家童走相報檐角桂花開想到窳軒外此時方試梅

除夕

去國八十日計程逾六千長虞行不到到此及殘年無

復聞銅臭

此間不用錢故戲反山谷語

惟應烹海鮮蛤蜊與蚶醬隨

分佐拌筵

謝中丞餉節物

節物煩分餉殷殷地主情雖云施不報肯使受無名七  
筋沾皆足庖厨愧已盈似憐藜苆腹曾飽大官羹

向在  
內廷

歲除例賜羊鹿雉兔魚酒

敬業堂詩集卷四十七

欽定四庫全書

敬業堂詩集卷四十八

翰林院編修查慎行撰

粵游集下

起戊戌正月  
盡四月

羊城元日試筆戲呈中丞公

風光六十九回新老客殊方愧此身  
殘臘雪消正月暖  
閏年歷報兩頭春  
滄溟出日長  
先旦斗極移杓又指寅  
聽說官清民樂業  
便思長作嶺南人

二日中丞招遊署後園池分賦六首

昨枉嚴公駕今逢袁紹杯  
到來凡五日相見已三回  
禮豈為吾設花應待客開  
小甕何太早紅雨點蒼苔

北闕逶迤徑東連宛轉城  
越臺當戶秀天井入池清倚  
檻堪垂釣聞歌想濯纓  
向來瀟灑意只視此官輕

老樹何人種名園此地無  
自多新氣色無改舊規模  
曳杖馴麕子看松長鶴雛  
恍疑蓬島近不似在城隅

勝踐煙霞外春風步履初  
餘恩沾草木得性狎禽魚  
巖

壑真同趣亭臺畫不如板輿迎養便未許賦閒居

竹密晴疑雨林深暖亦寒不知官閣好但覺旅懷寬  
蠻果充枲飮江鮮佐食單平生滋味薄相對勉加餐

此外無賓客應憐老病翁交原因臭味賞亦到兒童

時兒

念侍行 憂樂論先後行藏感異同却將詩送日良晤詎勿  
勿

### 過前輩梁藥亭故居

風流雲散雨茫然轉瞬前遊十五年

癸未春余入館先生散館 獨客

遠來朋舊少貧官沒後子孫賢買鄰古有千金語遺豪  
今為萬口傳話到五交宜廣絕西華葛帔復誰憐

立春日張梅麓前輩招飲雲麓堂

仙萸五葉撰良辰畫繡還鄉恰及春海內久推黃髮老  
堂中猶侍白頭親金花彩勝隨年換銀燭華燈照座新  
今夕從君論出處始知天地有完人

時張以養親告歸

喜晤藍公漪

藉甚榕城叟才名洵不虛氣吞三斗墨筆吐五車書客

况浮萍合交情碩果餘臨邛有賢令  
謂姚番  
吳齊州猶足重相  
如

人日雨中遲公漪不至

夜夢羅浮春碧桃千樹霞醒來枕上雨落盡城中花東  
風冷笑人謂若坎井壺當門列雉堞雲霧重周遮我懶  
不能出招呼及鄰家速客客不來舉杯還自嗟一歡難

強致由命匪由他

用昌  
黎語

謁南海神廟

姚侯送我遊黃灣澄江一道晴無瀾黃昏到岼天色變  
徹夜震撼號驚湍平明謁海神雲氣解駁光斑斕殿中  
擊銅鼓聲落海外迎潮還巡簷繞廊看古碣手剔碧蘚  
青苔斑或歌或仆或屹立節角劇殺形模殘煌煌

御書碑迴出唐宋元明間浴日孤亭表其右七十二級  
直上窮躋攀不知搏桑出地幾十丈頓覺東西南北四  
望無遮攔驪龍吐珠蛟歛涎陽烏擊水鼇移山祝融分  
位當炎躔萬象呈露秋毫端紫霞紅浪上下兩摩盪中

有萬點風檣竿星流電掣到廟下一一椎髻垂花髻吾  
皇膏澤被百蠻遠人畢至邇者安自從計臣握竿變新  
法鹽筴纖悉多歸官廣川大澤禁漁獵網漏魚鼈羣生  
慳問神受封今幾代蒿目豈不知時艱

國家大事必祭告謂是正直靡欺謾幽明貯蠶一氣旋  
憂樂當與民相關曷不草綠章為民請命

恩宜頒但使方隅獲沾山海利神亦坐享血食無慙顏

附擬南海神荅查悔餘先生謁廟詩 佟法海

先生蒼顏鶴髮七十強磊磊落落詩名天下揚笠箬  
屨芒屨竹杖水浮陸走萬里來災方羅浮神仙窟羊  
城富貴場掉頭兩不顧輕舟獨泊戩旗岡徑上七十  
二級浴日亭愁看暘谷金暈浮扶桑直入廟中搗銅  
鼓鼓聲遙撼零丁洋蒿目時艱不可說惟神若可默  
贊襄高歌如慕復如怨怨到海神神亦傷自從祝融  
宅南海風非古昔俗諍張田荒莠長蝨蟲活常平十  
郡封空倉一水虎門扼衝要雕蹄鑿齒通來王珠璣

翡翠珊瑚樹玳瑁靈犀琥珀光罔象見利亦忘義  
揄壘斷雜官商鹽法榷法不可問山盜洋盜爭強梁  
職守一方司民命安敢坐視蒼生殃獨憑正氣觸百  
怪幾夜辛勤草綠章豈知山鬼足伎倆陰晴播弄蔽  
太陽茫茫萬里九天遠狂風吹倒百鍊剛古來天定  
能勝人人定亦能勝彼蒼吁嗟乎人定勝天可奈何  
尸位不去慚顏多詩家若有幹旋手請君更作回天

歌

海雲寺同藍采飲王符躬作

波羅廟下凌晨發直到雷峯弭畫橈  
一綫春流通斷港  
華鯨南應虎門潮

水窮雲起得禪關  
突兀樓臺數十間  
曲曲迴廊隨步轉  
不離平地却登山

木棉兩樹最稱奇  
拔地叅天萬萬枝  
自笑杖藜來較蚤  
不關渠事作花遲

一龕容得十方僧  
個是天然第二燈  
更約羅浮觀日出

尋師還上最高層

住持塵異時  
住華首臺

與番禺姚明府齊州二首

樓指修門別俄踰二十年君顏猶白哲我髮已華顛  
毛檄差堪喜王鳥自得仙春風花滿眼及此話前緣

簿書原不俗插架有牙籤詩好人人說才優事事兼  
肯教同列忌難得上官廉驥足行將展毋須嘆久淹

花田咏古

鴈翅城南寂寞濱芳華小苑已成塵珠襦夢斷鷓鴣曙

粉麝香消雨洗春翠輦幾經偏霸王素馨曾識故宮人  
賣花擔上東風信流轉人間又一巡

珠江權歌詞四首

一生活計水邊多不唱樵歌唱權歌  
蠶子裹頭長泛宅  
珠孃赤脚自凌波

剪得青蒲織作篷平鋪如席卷如筒  
往來慣是乘潮便  
不使朝南暮北風

生男不娶城中婦生女不招田舍郎  
兩兩駕央同水宿

聘錢幾口是檳榔

米價高于珠價無就船剖蚌換青蚨  
近來官長清如水  
不是珠池亦產珠

大行仁憲恪順誠惠純淑端禧皇太后輓歌二章

彤史媯皇紀徽音

壽母賢手襄開朔業坐閱太平年  
典禮三朝備哀榮五  
福全北山松頂月移照賁重泉

鳳輦承顏地龍樓問寢晨

一人隆孝養萬國仰尊親海角宣遺

詔宮中閱早春朝班瞻望遠淪落泣孤臣

呈前輩鄭珠江先生

鄭公有瑣彥雅尚寄林泉在野長憂國觀空晚入禪與  
時疎應接顧我數入周旋此意能無感依依杖屨前

偕梁孝穉遊法性寺有懷心月上人兼示希聲  
學子四首

有約尋僧去攜筇出郭賒東風吹白髮春事到梨花石

畔三生路林間一味茶橫枝不傳法消息問誰家

一片青苔色當門屐齒留近身無俗物望遠得高樓轉

覺城中隘真宜象外遊折腰吾不慣到此小低頭

蒼苔  
樓下

心公影  
堂在馬

欄楯遙相望中開一畝池波明堂欲動魚樂我先知惠

遠流風在柴桑入社遲勿嗟耆舊盡弟子總能詩

藥亭  
舊與

心公結詩  
社于此

蓮漏晨猶滴齋鐘午罷敲沙彌通佛性居士慰神交

座

喜晤周  
乳峯

庭長枕柳節窗臨翡翠巢  
重來應未厭幽事滿

西郊

長壽菴坐湛禪師方丈聽談石公舊事

津梁誰得限傳法到交南涉海如航葦還山遂築庵  
劫難逃宿業風不動崑崙賢嗣真龍象千鈞獨力擔

齊州於縣治之左新闢園池名梅花邨暇日與  
客同遊索賦

蒼苔一曲轉東垣廢地俄成十畝園  
行處軒窗多入畫

望中花柳却疑邨南通海眼安池位北引山光落酒樽  
直作吾廬吾亦愛萍踪隨水欲生根

上官竹莊為余寫青山歸擢圖公漪有詩戲次  
其韻

舊聞五嶺皆炎熱到此能無憶冷泉不謂留行無地主  
老夫興盡却迴船

為友人題暮雲春樹圖二絕句

渭北與江東斯人兩不作借取一幅圖為君論詩學

暮雲與春樹此景世不乏借取一聯詩為君論畫法

佟醒園以騎驢出嶺圖小照索題戲作六言律

詩一首

我愛竹莊妙手為君寫此橫圖天南豈無鴻鴈

醒園與中丞為

兄弟行故云

嶺北猶聞鷓鴣莊言非馬喻馬佛說騎驢覓驢

一笑不離行脚阿誰先取歸途

時余亦將歸

題翁蘿軒為藍公漪所畫枯樹小幅

故人垂老交情為寫枯枝贈行喚起羅浮春夢來聽紙

上秋聲

有以白菜餉中丞者中丞有詩屬和韻

閉門風味宛然存  
菜把猶多餽送痕  
傳語園官須手種  
亟乘春雨斲籬根

王符躬舍人席上贈許蒼嵐

許侯天下才  
曾宰樂昌縣  
官如已墮甌  
棄去胡足戀  
邂逅結襟生  
呼朋開廣宴  
君乘斑駁來  
遇我心相善  
昨日誦君詩  
今朝識君面  
冰壺貯秋月  
表裏皆可見  
平生千

丈氣對酒尚豪健一吸盡一升卷波看白戰商聲帶河  
嶽風日為之變我欲和此歌朱絃忽中斷

清涼山莊圖符躬屬題

舍人示我山莊圖生綃橫展五丈餘良工三年寫始就  
金谷輞川何足摹君家舊住清涼麓萬里江天入遐矚  
故應胸次豁然寬占斷此山猶未足石頭城門平旦開  
千巖暖翠排空來珊瑚碧樹好顏色照耀初日生樓臺  
樓臺高下無重數徑轉溪迴總迷路標題一一都有名

毫末微茫指其處問君結念母已奢洞天福地歸一家  
潰成奚翅萬金產還恐山林跡尚賒君言好事皆虛事  
架構良難畫差易未能依樣買園亭乍可隨身蓄巾笥  
海山兜率吾不知此圖要亦人間稀神仙只被瑤京誤  
楚鶴何天不可飛

正月晦日喜雨用中丞見示原韵即以志別

風花半落經春暖雷雨初來送曉寒農事相關公最喜  
物情不隔我同歡雞鳴如晦方懷友蛙鬧何知豈為官

借取一篙清漲水野人歸欲濯纓冠

題上官竹莊羅浮山圖

大瀛海外有十洲巨鼇不上龍伯鈞何年背負蓬島至  
兩山合一成羅浮竒峯三百三十二一豈易窮冥搜  
眼中孰是好竒者上官山人今虎頭山人欲為山寫照  
直上崔嵬走馱馱朱明古洞華首臺佳處真能領其要  
歸來繪作指掌圖萬象攝入摩尼珠綠毛鳳挂佛子髻  
五色蜃化仙人襦我方神遊力不足為爾題詩展橫幅

正緣身不在山中識得羅浮真面目

光孝寺與笑成上人

訶林冠嶺外重是古道場摩挲菩提樹躡躅風幡堂不  
見祖師面徒拈一瓣香上人方坐雨笑容疲津梁

次韵中丞公夢羅浮作

有意遊仙事竟違羅浮未到我空歸輸他準勅狂開府  
夢裏乘鸞獨自飛

將發珠江遇李約山觀察自粵西來訂同歸之

約

世途歧出處長恐見無從只隔東西粵相望千萬峯君  
其李元禮我豈郭林宗江上同舟約何期邂逅逢

海幢寺十二韻

阿字禪  
師道場

洞中衰復振派衍自天公半是逃名客羣稱出世雄雲  
幢標郭外香界湧南中填海為平地叅天起梵宮欵成  
疑鬼運幻出儼神工穗石浮佳氣朝臺拜下風五仙皆  
法護十力盡神通躡踏諸方徧跏趺片席崇我來塵世

隔師去影堂空法供瓶爐潔齋厨菜豉豔映階筍竹翠  
耀眼木棉紅綠境他生結留詩記此翁

二月八日初離廣州

來時麥苗綠歸路麥穗黃南方冬春交物候總不常可  
憐百萬戶戶戶資春糗曩苦食無鹽今愁米價昂温風  
送微雨中有餅餌香忍饑待食炒差勝犁遷荒

嶺南廢田有遷

荒老荒

等名

舟過三水邑宰徐君來晤口占贈之

徐由庶常  
改官新莅

土 茲

三水合流處孤城近海孺誰知花縣宰舊是玉堂仙  
叱俗觀新政官情耐左遷天涯相識少為爾一停船

羚羊峽

兩崖挂羣龍下飲一江水水窮山忽住水轉山復起  
草木所不生石頑盡橫理惟聞露猿呌杳杳雲霧裡

朱觀察紫垣席上賦贈

我識朱公子佳名在棗香承家新節鉞開府舊封疆才

大移風速官閒化日長三州行按部處處有甘棠  
昨日中丞座唸君唱和詩法從前輩得清受大僚知細  
雨凝香室春風畫戟枝掣鈴容墊老雲樹慰相思

戲東高要令王寅采同年

崧臺君暫憩雲嶠我間關白髮重攜手青春好駐顏  
開鸚鵡眼香點鷓鴣斑割愛煩斟酌無踰二者間

登端州城東閱江樓

好事何人送酒來自扶桑屐躡崔嵬山從迴雁峯頭落

潮過羚羊峽口回浩浩風聲隨几杖濛濛蜃氣出樓臺  
天公不薄將歸客霽色今朝為一開

時久雨乍晴

望七星巖

維北有七星天樞永不移寓形忽隕地幻作巖壑姿我  
登閱江樓高咏慈恩詩七星在北戶一一俯視之此生  
名山遊待了婚嫁期洎乎婚嫁了筋力恒苦衰輸他有  
力人濟勝忘歛崎猶賢無目者興到目尚隨

望夫山歌

杜鵑花紅映白杜鵑鳥嘔吐血阿夫去作海上客阿嬾  
山頭化為石望夫不歸兮可奈何蠻風蠻雨春來多

封川

十咏傳嘉祐

宋嘉祐中田開知封州有  
臨封十咏盛誇風土之美

征途喜乍逢時

平山少盜俗儉戶勤農  
趁雨收新麥連邨急暮春  
江船多賈客一稔給鄰封

梧州

東粵行初盡三江此要衝  
商通藤縣米簾出象州  
松北

望雲千疊南來瘴幾重小舟如箬籠雙膝劣能容

雨中飲梧州郡守范拙存署齋

清絕蒼梧郡山城並水涯使君非俗吏官閤似邨家雨  
戰梭欄葉籬編豆蔻花春寒連日甚勸我酌流霞

與郡丞趙默菴話舊有感

憶昔赴黔幕買帆沂漢陽趙家好弟兄一見傾肺腸吾  
兄謂韜荒亦豪士齒序同雁行君時甫弱冠意氣爭顏

往往副虛懷高譚陋詞章風塵一揮袂自爾成參商

忽四十年舊遊半存亡兩萍浮大海乃在天一方

東坡詩蒼

悟獨在天一方

我髻既摧顏君顏俄老蒼大才屈佐郡何以展

爾長蠻城二月中天氣如梅黃入門巾屨溼急雨鳴淋  
浪呼童啟書齋延我卧竹牀此情不殊曩此景安可常  
別易會苦難况迫桑榆光臨分留數語俛仰多感傷

### 逆風上灘歌

船頭喜銳不喜方竹篙用短不用長上灘取逆不取順  
出險在閒不在忙老夫昏昏蓬底坐靜聽兩旁風雨過

深慚作力役多人成就垂綏一游情

雨中過昭平縣與馬莘叟

風磴層層上衙齋踞地高到門雲氣合入座雨聲豪已  
覺簿書簡猶多迎送勞酒香奴飯白青眼愧吾曹

龍門峽

龍尾千層雪龍頭萬斛濤峒形當絕險崖勢故爭高木  
馬船名騰槽立藤蛇絡石牢雲端牽百丈絲路辨秋毫

佟中丞貽我羅浮蜨繭數十枚三日前雙蜨先

出置之籠中朝來風日晴暖栩栩欲飛因開籠  
放之

五色仙山繭分貽不計枚似貪歸路近雙翅獨先開此  
宜籠中物無端入夢來人間何足戀好去莫徘徊

相傳此蝶

雖在千百里  
外必返故山

楊誠齋詩有韶州山又勝雄州之句余過英德  
為進一解曰英州山又勝韶州今日行至平樂  
城南羣峯競秀爭奇目不暇給英山又不足言

矣問之土人無能舉其名者然不可無詩紀之也

突兀離竒縱復橫峯稠嶂疊總無名千尋自拔雲霄上  
萬古何曾草木生佛指佛螺青未了石蓮石筍畫難成  
天教增損詩人眼直覺昭州又勝英

晚泊劉公渡望對岸諸峯

澄江一道鏡初鎔寫出東南隔岼峿峯指掌圖中看倒影  
夕陽一百二芙蓉

陽朔縣

雲從巫衡來勢落桂嶺外散為堆結扶陽朔乃都會森  
森競駢植巘巘或孤介滿眼盡兒孫丈人竟安在孤城  
如廢井百堆陷其內亦復設官司于茲嶺岩峩兩衙排  
籤立日與刀劍對匪曰牧人民而云禦魑魍昔賢遷謫  
到所以多感噫俾山蒙惡名夫豈山之罪不作一錢直  
斯言母已太

聖朝懷遠人吏職視殿最此邦瘴癘區遷轉異流輩于

今號捷徑上考率三載寄語親民官後來須自愛

春燒

粵俗不好生連山發春燒新英與枯拚往往同一燎昆  
蟲方啟蟄被虐慘無告造化豈不仁吁嗟落蠻徼客行  
天南陬半月抵都嶠侵肌苦毒霧白日罕朗照五行或  
偏勝風痺恐難療焉可無繼離易疏以離上三爻  
繼明者為火來為萬  
物燥人情懷所便即事具慶弔此樂非彼欣相哀莫相

誚

桂江舟行口號十首

龍江驛前水倒流竹棚移上別山頭趁墟人去愁喚渡  
失却閤沙剗木舟

灘江江色綠於油百折千回到海休多事天公三日雨  
一條羅帶變黃流

水自東流客自西經過大抵是淒迷木棉枝上鉤輶鳥  
夜夜夜深不住啼

下灘不信上灘勞比似登山步步高好語稍公牢把柁

上前只費兩三篙

行近昭潭灘倍多  
扁郎勸力唱牙何此聲  
莫作尋常聽  
便是湘南欸乃歌

南望蒼梧北桂林  
中間七驛瘴尤深  
不知雲氣藏多少  
能使蠻天日日陰

霧雨濛濛霽景稀  
人編蕉葉作蓑衣  
櫓搖漁父唱歌去  
牛背牧兒浮水歸

戍旗相倚有人家  
水退依然就淺沙  
二月芳菲看已盡

滿灘蘆葍自開花

過盡頑礪亂石堆繡山一穴忽天開明知不是秦人洞  
容得漁舟日往來

一月春寒甚臘寒北風颯颯上檣竿南人不辦冬衣服  
也道朝來袂勝單

飲同年叢汝霖桂林學署兼志別

不以他途雜時猶賸此官名傳人口易實獲士心難行  
色春將晚離筵花正殘蠻城一杯酒懷抱若為寬

上巳前一日發桂林

連日輕寒連夜風滿城  
桃李一時空伏波門外  
梨花雨  
春在鶻啼猿嘯中

靈川縣齋清明

已過上巳即清明  
一月天纔兩日晴  
記取靈川好風味  
新茶新豆到山城

平蠻歌為靈川令樓敬思作

槃瓠遺種成野豻  
充拓百粵西南間  
桂林所屬半猺獞

搖性稍馴獍性頑獍中廖三乃最狡結砦背子

義寧縣山名

藏神姦義寧邑宰畏如虎長惡不復加防閑康熙五十

有六載遂逞螫毒為民患

叶平

公然越境大劫殺乘勢搖

動西江灣

東西二江在興安靈川兩縣界中

靈川棲侯奮髯怒一念軫

卹周痼瘵請于中丞願勦賊朝發夕下無留艱官軍壓

境屹不動菊魄翻笑書生屨豈知仁者必有勇勇氣遠

過齊成觀

出孟子註疏

力捐百鎰鑄戎器更募丁壯踰十鍰

仲冬誓師謁神廟聲並淚下垂潛潛與神幽明共守土

捍禦災患宜相關狼貪豕突忍坐視一任滿耳啼孤鯨  
陣圖兵法貯腹筭臨事布置神安閒先營辟隍後張構  
下極坑谷高躋攀天寒雪少但瘴霧地盡石出皆榛菅  
孤軍深阻三百里間道別取千尋山賊巢漸近徑彌惡  
出賊不料攻而環焚林燎穴何處遁照耀巖壑采旗殷  
渠魁就殲脅從赦散以畎畝閭閻自從出疆迨飲至  
三十五日師旋般明朝獻馘上幕府隊仗整肅排班  
受成例應給大賚為國惜費情非慳有酒盈缸其色碧

有羊在牽其首昉侯不居功以歸衆單醪挾纊胥均頌  
人傳封事上

北闕我適問道將西還過侯治下暫弭檝為我掃榻開  
門櫪杯闌抵几聽陳說竊嘆膽氣何其殊如聞鼓鼙作  
餘力如覩介冑當躬擻

朝廷設官鎮羣獠文武分職毋相奸至今儒臣建偉績  
壯士毋乃多頽顏是庸作歌勒諸石義在小雅誰能刪  
他年米入桂海志碑額不愧書平蠻

樓敬思朱襲遠追送于大澗江賦三言古詩為

別

胡桐花萬堆雪躑躅花千層血大波淪小波沕百斛舟  
十夫力居者主行者客湘江南灘水北雲淄淄風淅淅  
難莫難此時別

靈渠行

驚瀧下走三百灘上流何至一掬慳灘源濫觴乃在此  
七十二重灣復灣比渠鑿自秦史祿初僅能通不能蓄

迨唐觀察李濬之添設陡門三十六石槽石斛升斗儲  
一門典守用兩夫鐮隄前啟後下板修綆汲船如轆轤  
雷轟電掣飛一綫盈縮直從呼噏變官船銜尾客船停  
那得人人與方便勸君小泊底須愁不過多為半日留  
平生恥共人爭路况有林巒慰勝游

陡中巖  
岫絕佳

夜泊鐮背伏波祠下湘灘二水分流處

伏波祠下枕江濱湘北灘南兩派分  
新月滿船天在水  
蒼梧回首萬重雲

興安田家

澁勒連邨綠樹濃家家臨水設機舂刀畊火種風初變  
問是山農是澤農

夕抵全州城外

晨發鉞背潭暮抵洮陽境急流二百里一宿兩程併去

通塞世多途疾遲吾有命適來非意計及此聊乘興峩

峩湘春樓鬱鬱蒼松逕

城南松逕亘百餘里  
相傳陳堯叟所植

咫尺不可

尋黃昏風雨橫

零陵道中

旗脚東北擲朝來，乘便風清湘送帆。  
影翩若南歸鴻，臥看兩岸山白雲。  
起蓬蓬前飛不作，雨掠過青玲瓏。  
導我向零陵，為我驅霾霧。  
在遠睇歛接緣，沿路靡窮昔讀子。  
厚記神遊乎其中，溪山豈不佳好事。  
疇繼公便欲訪古蹟，征途去匆匆。  
無人為指似草木徒龍蔥。

題浯溪寺中興頌磨崖碑後

在祁陽縣東南五里

靈武功成賴朔方，中興名號遂歸唐。  
少陵善頌無多語

勲業汾陽異姓王

千古磨崖一統碑後來山谷有題辭  
獨教官蹟留餘憾  
不刻春陵數首詩

三月十五日夜湘中見月

于役忽半年孤懷寄歸艤北來四十宿  
今乃辭瘴鄉地  
當衡永交水派瀟合湘明波蕩圓魄  
春月如秋光乾坤  
清氣中草木流真香  
琴琴風乍發滂滂夜何長  
遙聞漁父歌鼓柁下滄浪白鷗飛  
不到江永烟蒼茫

過郴江口有感于杜工部事

十載遊巴峽三年客楚疆青袍常避亂白髮儼投荒許  
國才難盡憂時命不長靴洲疑冢在過者亦神傷

望衡嶽

昔遊曾到長沙郡三十七年今又來夜向湘江聽雨過  
曉從衡嶽見雲開帆移九面鏡中轉雁斷一行天際迴  
欲著青鞵還自嘆已無脚力上靈臺

徐靈期南岳記衡  
山者朱陵之靈臺

淶口沽酒

沙灣小市柳毵毵  
露渌筍成味最甘  
滿引一杯歌一曲  
無邊春色洞庭南

醴陵縣

長沙封壤盡僻路  
極崎嶇一水趨湘  
急孤城入楚深怪  
禽號少伴班竹泣  
成林苦語騷人得  
幾同木客吟

前過常山玉山今過醴陵萍鄉四縣令同以一事去官偶紀之

朝廷惜民力大事給郵符  
朱邱徵求急皇華道里紆  
上

官曾有檄小吏似無辜獲罪由腰笏寃哉何易于

自湘東驛遵陸至蘆溪

黃花古渡接蘆溪行過萍鄉路漸低吠犬鳴雞邨遠近  
乳鷺新鴨岸東西絲繅細雨沾衣潤刀剪良苗出水齊  
猶與湖南風土近春深無處不耕犁

復入舟

天公假我一日晴籃輿軋軋山中行山行既盡復買棹  
歌枕夜聞雷雨聲諸灘暴漲波雲雲人與鷗鳧互相雜

秀江橋外櫓枝柔穩過袁州小三峡

牛欄鍾山昌山三峽在宜春分宜兩

縣界

中

盧肇宅在宜春城外今為學宮石筍一株猶存

相傳唐時故物也

舊聞盧氏宅中有讀書臺地以名流著人探古蹟來便

應呼石丈幸不中碑材

顏魯公事見歐陽四門集

秀色如堪挹摩挲

一片苔

分宜感事

曾從史館見長編太息明朝嘉靖年  
牛李恩仇初植黨  
京攸父子互爭權東門牽犬情相似  
西市駢梟世不憐

贖檢鈐山籍官簿兩橋猶盜水衡錢

嚴氏父子敗後有司籍其家事見鈐

山籍官簿中當時于州縣城外造兩石橋費各鉅萬世蕃皆盜官錢為之鄉人不知至今猶有稱道其事者

### 清江道中

甘林百里夾清江岸  
風來白雪香何減  
浣花溪上路  
人家多在果園坊

### 重泊鉛山河口却寄施溥如

弱纜牽船與岸平一支春漲轉山鳴坐看片月流雲影  
臥聽長風挾雨聲此地故人曾有約重来小吏最相輕  
講堂不到吾滋愧為報新編志已成

去春曾枉書幣邀余修鵞湖書院志

今屬豪粗就施已內摧離任矣

朱甥德璵出家為僧法名某號渭宗今住沙溪

靜室舟經其處留詩一首

汝甥吾是舅夙世世間緣見面尚相識出家今幾年但  
能修苦行不在學參禪蚤晚黃梅雨隨農且種田

自題粵遊草後

老夫不怕寒怕熱冬月出門夏到家輕負嶺南三百顆  
此行剛看荔枝花

一日倒吟詩一章中間未覺應酬忙無端來往萬餘里  
題徧前賢謫宦鄉



敬業堂詩集卷四十八